

Powšitkowne WOZJEWJENJA

njedźelu, 3. apryla 2011

Nóc wujednanja w hnadownej cyrkwi

Wšitcy wěriwi, hač muž abo žona, młody abo stary, su pjatk do bołmončki, 15. apryla, do Róžeńčanskeje swjatnicy přeprošeni. Kaž Alojs Andricki w swoim času, tak chcemy tež my so pola maćerje Božeje na lipje zetkać a so přez nju Bohu dowěrić.

Nóc wujednanja wuhotuja serbscy młodostni. Wona započnje so w 19.30 hodź. a skónči so z Božej mšu w 23.00 hodź. W běhu wječora wobsteji móžnosć, so modlo, na hudźbu sluchajo abo ćicho rozpominajo wo sebi přemyslować, na Boha sluchać abo so z tekstami kapłana Alojsa Andrickeho rozestajeć. Wobsteji tež móžnosć, k sakramentej wujednanja, swjatej spowědži, přistupić abo jednorje wo duchownu rozmołwu prosyć. Džewjeć serbskich duchownych steji w běhu wječora k dispoziciji. Kóždemu je samomu přewostajene, kak sej wječor časowje zarjaduje. To rěka, zo je móžno, přez cyły čas přítomny być abo po svojim dobrozdaću přińć abo hić. Zwonka cyrkwy poskići so ćopły čaj.

Hudźbny nyšpor w Marijinej Hwězdze

Kruh přećelow klóštra Marijineje Hwězdy přeprošuje tutu njedźelu, 3. apryla, w 16.30 hodź. na póstne rozmyslowanje z hudźbu do klóšterskeje cyrkwy w Pančicach-Kukowje. Zaklinča „Róžowcowe sonaty“ Heinricha Ignaza Franza Bibera.

Přednošk k serbskim cyrkwiskim stawiznam

Wo serbskich cyrkwiskich stawiznach na wuchodze něhdyšich serbskich kónčin wokoło Žar přednošuje štwórtk, 14. apryla, w 19.30 hodź. w Budyskim hosćencu „Wjelbik“, Žitna 7, dr. Doris Teichmannowa z Berlina. Wědomostnica předstaji swoje slědženja k temje „Późdni srjedžowěk a zažny nowowěk we wuchodnej Delnjej Łužicy“. Na přednošk, kotryž budže w němskej rěči, přeprošuje stawizniska sekcija Maćicy Serbskeje.

Zhromadny dzeń za 3.a 4. lětnik

Šulerki a šulerjo 3. a 4. lětnika su sobotu, 9. apryla, wot 9.00 do 15.00 hodź. na kubłanski dzeń do Don Boskowneho domu we Worklecach přeprošeni. Zajimcy njech so prošu hač do wutory, 5. apryla, we Worklecach přizjewja, telefonowe čisło (03 57 96) 8 87 07.

Zetkanje Serbow w Drježdźanach

Serbja, jich přiwuzni a znaći w sakskej stolicy su sobotu, 9. apryla, na ekumeniski nyšpor ze serbskim superintendentom Janom Malinkom přeprošeni. Nyšpor budže w 15.00 hodź. w cyrkwi swjatejo Józefa na Rehefeldskej 61. Po nyšporje zetkaja so wšitcy w Šoćic kofejowni.

Měšniski seminar zeznać

Młodzi mužojo wot 18 lět, kotřiž wo tym přemysluja, hač su snano za službu Bohu a blišemu do měšnistwa powołani, su na informaciske dny do Erfurtskeho měšniskeho seminaru přeprošeni. Tute wotměja so wot pjatka, 29. apryla, do njedźele, 1. meje. Zajimcy měli so hač do pjatka, 15. apryla, přizjewić na adresu:

Priesterseminar Erfurt
Regens Wolfgang Ipold
Holzheienstraße 15
99084 Erfurt
Regens@Priesterseminar-Erfurt.de

Příležitost k swjatej spowědži w Róžeńće

pjatk, 8. apryla pater Irenäus Krause, farar B. Jakubaš
17.00 – 18.00 hodž.

sobotu, 9. apryla pater Irenäus Krause, farar J. Magiera,
17.00 – 18.00 hodž. farar M. Anders, farar B. Jakubaš

pjatk, 15. apryla pater Irenäus Krause, farar C. Hrjehor,
19.30 – 23.30 hodž. farar G. Warnar, farar M. Anders,
farar M. Nawka, farar Š. Delan,
farar M. Deleńk, farar W. Sćapan,
farar D. Dzikiewicz, farar G. Nawka,
farar B. Jakubaš

póndźelu, 18. apryla pater Irenäus Krause, farar R. Kilank,
18.00 – 19.00 hodž. farar M. Anders, farar H. Morawietz

wutoru, 19. apryla pater Irenäus Krause, farar B. Šořta,
18.00 – 19.00 hodž. farar R. Kilank, farar G. Warnar

Za putniskej jězbje hišće městna swobodne

Za slědowacej putniskej jězbje su hišće městna swobodne: Prěnja powjedže wot wutory, 3. meje, do štwórtka, 5. meje, do Magdeburga. Wottam je wulět do Halberstadta a na Huysburg planowany. Zajimować budžetaj nas w tutyh dnjach swjata Mechthild Magdeburgska a swjaty Norbert Xantenski. Druha putniska jězba budže wot štwórtka, 20. oktobra, do štwórtka, 27. oktobra, do Francoskeje. Wopytać chcemy Straßburg, Vezlay, St. Odile, Ars, Cluny a Taizé. Naš „putniski swjaty“ budže swjaty Jan Vianney, farar z Arsa. Prošu wšitkich zajimowanych wo bórzomne – to rěka hač do njedźele, 10. apryla, – telefoniske přizjewjenje pod čisłom (03 59 35) 2 04 25. *T. Kubašec*

Nyšpor z požohnowanjom motorskich

Popołdnjo z požohnowanjom motorskich zahaji so njedźelu, 8. meje, w 14 hodž. z nyšporom w Ralbičanskej cyrkwi. Po nim požohnuja so motorske. Přizamknje so wulět.